

AQUILEE: FIESTE NAZIONÂL DAL STÂT FURLAN

Cence fâ grancj sunsûrs, a troputs, si vin dâts dongje di dutis lis bandis dal Friûl pe nestre fieste nazionâl dai 3 di avrîl. No 'nd jere tante intonone, ma and jere plui che no chescj agns passâts e soredu, gjavant ogni cantin folcloristic o di façade, chei che a son vignûts a savevin benon che si tratave di une fieste cuntun intono clâr: ricuardâ cence trionfalisms o nostalgjis o picis teocratichis un grant moment di storie furlane e pò resonâ, in amicizie e cun plene libertât te diversitât, sun ce che si podarès fâ par dâi al Friûl un 3 di avrîl intonât cul vivi di vuê ma cul valôr d'in chês volte. Ce che si à podût capî de clime tant in basiliche che, dopo, a cene a son dôs peraulis-clâf che a varessin di jessi il cjantonâl par ogni vore in pro dal Friûl e il provîn di ogni iniziative che si cjararà in merit de sô autonomie. Dî che il Friûl al é une nazione, cumò dome un reazionari o un vuarp al podarès vê il fiât di dineâlu e sustâsi. Par consequence, o vin dirit di batisi pe nestre autonomie, la plui largje e vere pussibil. Chêi che a son sun ceste linie ju ritignin amîs dal Friûl, ancje se a partissin di posizions ideologjichis diferentis. Il lôr impegn concret al sarâ il speli de lôr onestât. Chêi che a vuelin fevelâ di Friûl ma no intindin discori di nazionalitât e di autonomie, o scugnarin considerâju sicu nemîs efetîfs dal Friûl, ancje se a cjacare a saran furlanons. Tal mieç, la grande masse di int, che e sta spietant alc di gnûf, di concret, di biel, di vîf, massime cumò che si sta disamorant de grande "Patrie" e che e sta cerçant il gust e la passion de vere Patrie nostrane. E chi and é puest e vore par ducj, soredu pai zovins, che a puedin cjarâ un passon straordenari pe lôr sen di fâ, di gambiâ e di meti adun un mont plui just.

Te basiliche mari, simpri plui bieles ogni volte che si jentre, and jere ancje int che no si varès crodût, e cualchi bandiere che no coventave; viodi bandieris dal Friûl nus implene il cûr di contentece, ma i partîts a àn di tignîsi i lôr peçots fûr des glesiis. Par un lamp o vin scrupulât che si tratàs plui di tornecont che no di religjon, ma cui puedial jentrâ te crepe e te cussience di chei âltris? E no aial dit chel grant om di Rico IV, il Bearnês, che par vê Parigji si pó riscjâ ancje une messe ?

Si tornarin a cjarâ, se Diu vûl, l'an che al ven. Par lâ indenant; par cjarâ coragjo; par cognossisi miei. La storie, seben che e je fate a magne vie, e à simpri alc ce insegnânus e «un popul che nol sa dontri che al ven, nol pò savê dulà che al va».